

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 54 (1968)

Vorwort: Al lectur digl Ischi 54, 1968
Autor: A.M.

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

Download PDF: 05.05.2025

ETH-Bibliothek Zürich, E-Periodica, <https://www.e-periodica.ch>

Al lectur digl ISCHI 54, 1968

Ils dus Ischis reuni 53 e 54 cuntegnan neginas raquintaziuns. Quei displai probabel al preziau lectur. La vivonda spirtala elevada, de tempra culturala ei de gronda impurtonza per la cultivaziun linguistica, d'impurtonza per il manteniment dil lungatg romontsch.

Nos vitgs e valladas spirontamein romontschas, cun scola exclusivamein romontscha ellas empremas quater classas primaras, continuaziun parziala tochen ellas secundaras, gaudan ina posiziun tutttavia favoreivla, gie la meglier pusseivla, considerond l'impurtonza dil lungatg tudestg en nossa tiara. Ei dat neginas alternativas enviers ina situaziun naturala, ideala e maximala dellas grondas naziuns cun ferm ed unic lungatg mumma per veta duronta. La giuventetgna de scola romontscha fundamentala ei, paregliada cun nos loghens periclitai, privilegiada da tuttas varts, dalla via, dalla famiglia, dalla baselgia e vischinadi romontsch. Sche quellas petgas restan tuttas intactas, po ni l'instrucziun tudestga en scola ni enzacons jasters terrar rempars. Ei mida denton situaziun radicalmein sche la famiglia romontscha vegn traditura, untgescha dalla dretga via.

Nus returnein al problem d'entschatta. Instrucziun romontscha en quater classas ed empau de pli, dat fundament sufficient per scriver en sempla moda, per leger pli u meins currentamein cudischs belletristics: romans, novellas e raquintaziuns. L'instrucziun gudida, interrutta tuttenina dall'instrucziun tudestga, tonscha denton buca senz'auter per lecturas pli grevas, teoreticas, professionalas.

Relaschai de scola che legian adina puspei lavurs e tractats compari en romontsch, che persequiteschan las novas ediziuns, gasettas e revistas, acquistan denton cul temps gronda facilitad era en lecturas pli pretensiusas. Cun satisfacziun vein nus savens saviu far stem che sempels umens e dunnauns legian cun tschaffen e grond profit lavurs scientificas, historicas, economicas, litterarias etc. Dasperas giuvens e giuvnas en casas romontschas che sescarpan per lectura tudestga! Savens mauncan ils cudischs romontschs che inflammassen nossa giuventetgna. Ei vegn adaquella ch'ella legia pli tgunsch e pli spert tudestg che romontsch. Igl ei pia d'eminenta impurtonza de slargiar en in temps della

supremazia tecnica, economica e d'industria las pusseivladads d'instrucziun e cultivaziun romontscha.

Cun bunaveglia ed energia davart singuls ed uniuns fuss ei tgunsch pusseivel d'introducir cuors romontschs permanents en nos centers romontschs, instituziuns paregliontas allas universitads popularas della bassa. Viarva, cultura e litteratura stuesen star el center. Ins tschontscha savens de scolaziun romontscha de nossa giuventetgna e dils carschi, mo cu vegn ella realisada?

Igl Ischi dubel 53, 54 / 1967, 1968 fa quest atun siu viadi tras la cuntrada. Reservei ad el in post d'honor sin cruna, bein contonschibels a giuven e vegl.

Las contribuziuns

Era en questa annada 54, 1968 introduceschan duas poesias d'in giuven poet igl ISCHI. Igl ei Linus Dermont cun: SALVAMENT e MURIR. — L'ediziun de treis lavurs manuscretas da Gion Antoni Hitz, Rueras (1873—1955) ein tschentadas viaden en in tscherchel empau pli vast cun introduziuns, notas ed illustraziun abundonta. *Per crappa massel jeu bugen*, ei la lavur principala. Pér pli tard ein vegnidas a mauns a nus: *Notizias sur dil cavar crappa en Tujetsch naven da 1896 — 1942*, sco era: *Ils cavacrappa ed il cavar crappa ella Val Tujetsch*. Tuttas treis audan ensemen. — Da P. Iso Müller deriva il studi historic: *Ils professers alla scola claustrala de Mustér 1856 — 1880*. Umens de scola enconuschents e meins enconuschents retscheivan actualitad e precisaziuns en lur activitads e lur vetas. — P. Ambros Widmer concentrescha e reducescha il vast problem de: *Il casus predicat el sursilvan* sin enzacontas paginas. Sper exacta scarplida dils fatgs, encorschan ins l'intenziun digl autur de promover e de mantener intacta questa interessanta atgnadad sursilvana. — Cuss. naz. dr. Donat Cadruvi regorda en moda competente ed amicabile de cuss. guv. dr. Emanuel Huonder.

A. M.